

Pader Baseli Berther (1858–1931)

Il pader, scolast, scribent, cronist, historiograf e conservader

Il Dieni da pader Baseli: in uclaun cun ton sco in per casas ed entgins clavaus. Leu manischava Duri Battesta Berther (1816–1882) in pign menaschi agricol, ensemen cun sia dunna Maria Ursula naschida Schmid (1821–1898). Ella vischinonza las restonzas historicas dil Casti da Putnengia, che regordan agl avat Pieder de Putnengia e fa endamen igl origin dalla Ligia Grischa. La casa paterna schai agl ur dil stradun sul Cuolm d’Ursera. Casti, stradun, casas e clavaus – oz il Dieni tursitic – ein ligiom dil vegl e dil niev. Aschia era pader Baseli, il perscrutader dil vargau e dalla historia dalla val e lu il pader e scolast ella claustra da Mustér.


En quei idilic e muntagnard uclaun ei pader Baseli naschius ils 10 da november 1858. Da batten, ils 11 da november, pil di da sogn Martin, ha el retschiert il num Giachen Martin. El ha passentau ses giuvens onns ensemen cun ses quater fargliuns, cul frar Tumaisch (1853–1931), igl enconuschent plevon da pli tard a Surrein ed a Medel. Els onns d’afonza ha il pign Giachen Martin viu a baghegiond il stradun dall’Alpsu atras la Val Tujetsch (1860–1864). Il bab Duri Battesta e siu frar Giachen Martin s’occupavan era sco sorprendiders da construcziun da vias. Els han obteniu dil Grischun e digl Uri mintgin ina sort da baghegiar, ina naven da Mustér tochen S. Brida e l’auter naven dil pass tochen al secund carau sul vitg d’Ursera.

Suenter haver absolviu las classas primaras ha el fatg in cuors preparatoric a Mustér en claustra ed ei lu 1873 serendius a Sviz ella emprema latina sco student extern. Siu frar, Tumaisch Giusep, era da quei temps el medem collegi ella 6avla classa. Suenter la 5avla classa ei Giachen Martin serendius per in onn a Friburg, probabel per seperfectziunar el lungatg franzos. Il cuors filosofic ha el absolviu 1879/80 silla universitad dad Eichstätt, che vegneva da quei temps frequentada cun preferenza da students svizzers. 1881/82 ei il Tuatschin commember dil comité central dalla Uniun svizra da students. Denton fa el era carriera militar. Cun 23 onns eis el gia premlitinent dil batagliun 90. Igl atun 1882 ha sia brigada fatg manevras en Tujetsch.

Suenter il cuors da filosofia e la via militar haveva il student Giachen Martin da rispunder sin la impurtonta damonda: Tgei clamada eleger? La risposta ha el dau cun s’annunziar el seminari da s. Leci a Cuera. Suenter dus onns da teologia ed in tierz ad Eichstätt splunta Giachen Martin vid la porta claustrala a Mustér e damonda dad esser admess sco noviz e vegn retschards dalla pintga famiglia benedictina. Ils 16 da december 1884 fa frà Baseli profess ed il matg suandont vegn el ordinaus sacerdot.



Il premlitinent Giachen Martin Berther



Il pader Baseli Berther

Gia sco noviz veva pader Baseli dau scola ed ussa ha ei num per da retschert. Aunc il davos onn, 1930/31, veva el dau las uras da latin d'ina classa. 1888 pren el enta maun la prefectura.

Duront 18 onns, tochen 1906, eis el prefect dalla scola claustrala! Pader Baseli era per propi conventual e benedictin. Siu confessional era adina bein frequentaus ed ins vesevi el bugen sin scantschala.

Da lezzas uras ha la claustra da Mustér giu ina partida distingui paders. Pader Baseli mava per vitgs ed uclauns a rimnond tut ils cudischs romontschs e funda la renconuschida Biblioteca romontscha claustrala. Pader Baseli rimnava scartiras e manuscrets tut insurin. El ei staus onns e decennis l'olma dalla Biblioteca romontscha che conserva ils gronds scazis da nossa litteratura e cultura.

Sper l'immensa lavur e scola, el chor ed en biblioteca ha pader Baseli anflau uras libras per scriver tractats historics-culturalis.

Pader Baseli ei suenten liunga malsogna morts la vigelgia da Nadal 1931. La sepultura ha giu liug ils 28 da december, nua che varga 60 persunas da Tujetsch e da quei da 30 spirituals ein stai presents. Bein in mussament da respect e renconuschientscha per la lavur da pader Baseli Berther en favur dil pievel dalla Cadi e la Romontschia.



Dieni, casa paterna